

**TEKS UCAPAN ALUAN**

**YANG BERBAHAGIA**

**PROF. DATUK DR. HAJAH ROZIAH MOHD JANOR**

**NAIB CANSELOR**

**UNIVERSITI TEKNOLOGI MARA**

**SEMPENA**

**MAJLIS MENANDATANGANI MEMORANDUM**

**PERSETUJUAN ANTARA UiTM & UUM & UNISHAMS**

**& LZNK**

**SERTA**

**MEMORANDUM PERSEFAHAMAN**

**ANTARA UiTM & UNISHAMS**

**3 OGOS 2023**

---

بِسْمِ اللَّهِ الرَّحْمَنِ الرَّحِيمِ

[Salutasi – kemas kini berdasarkan kehadiran]

**Yang Berbahagia Profesor Dr. Mohd Fo'ad Sakdan**  
Naib Canselor  
Universiti Utara Malaysia

**Yang Berbahagia Profesor Dr. Asmadi Mohamed Naim**  
Naib Canselor  
Universiti Islam Antarabangsa Sultan Abdul Halim Mu'adzam Shah (UniSHAMS)

**Yang Berbahagia Dato' Syeikh Zakaria bin Othman**  
Ketua Pegawai Eksekutif  
Lembaga Zakat Negeri Kedah

**Yang Berbahagia Profesor Dr. Roshima Haji Said**  
Rektor  
UiTM Cawangan Kedah

**Barisan Pengurusan Universiti serta para hadirin yang saya hormati sekalian.**

**Assalamualaikum warahmatullahi wabarakatuh,**

**Selamat sejahtera, Salam UiTM di Hatiku dan Salam Malaysia MADANI.**

1. Alhamdulillah, bersyukur kita ke hadrat Allah SWT kerana dengan limpah kurnia-Nya, dapat kita berhimpun secara maya pada hari ini sempena **Majlis Menandatangani Memorandum Persetujuan dan Memorandum Persefahaman antara UiTM** dengan tiga buah organisasi iaitu **Universiti Utara Malaysia, Universiti Islam Antarabangsa Sultan Abdul Halim Mu'adzam Shah dan Lembaga Zakat Negeri Kedah.**

2. Terlebih dahulu, saya ingin merakamkan penghargaan kepada pihak pengurusan tertinggi UUM, UniSHAMS dan Lembaga Zakat atas kesudian menjalinkan kolaborasi strategik ini.

3. Saya juga merakamkan ucapan terima kasih kepada pihak UiTM Cawangan Kedah berusaha melaksanakan kerjasama dan majlis yang sungguh bermakna ini.

**Para hadirin sendiri,**

4. MoA atau *Research Collaboration Agreement* yang bakal ditandatangani antara UiTM dengan UUM,

UniSHAMS dan LZNK ini akan menyaksikan kerjasama penyelidikan yang dijalankan oleh para penyelidik dari keempat-empat buah organisasi. Para penyelidik ini bakal berkerjasama dalam menganalisis fatwa-fatwa zakat Negeri Kedah daripada perspektif *Maqasid Al-Shariah* dan *Fiqh Al-Waqi*.

5. Mereka ini akan membuat kajian mengenai fatwa zakat yang diguna pakai dari segi tatacara dan kaedah membuat sesuatu hukum. Kajian ini dilaksanakan bagi memastikan objektif perundangan zakat tercapai dan kebajikan masyarakat benar-benar terjamin serta terpelihara.

6. Objektif ini selari dengan matlamat UiTM, dalam menangani isu kemampanan dan mobiliti sosial yang sentiasa menjadi keutamaan agenda kami.

**Para hadirin sekalian,**

7. Majlis pada hari ini juga akan **menandatangani Perjanjian Persefahaman** antara UiTM dan UniSHAMS.

8. MoU antara UiTM dan UniSHAMS ini pula bermatlamat mengukuhkan lagi kerjasama dari aspek akademik, kebudayaan dan penyelidikan antara kedua-dua buah institusi.

9. Saya yakin, perkongsian kepakaran antara UiTM dan UniSHAMS ini dapat memainkan peranan penting dalam menyokong dan menambahbaik persekitaran pengajaran dan pembelajaran. Ia akan dapat dicapai dengan pelaksanaan pengajaran kolaboratif dalam kalangan pensyarah UiTM dan UniSHAMS.

10. Selain daripada itu, MoU ini juga bertujuan mencapai persetujuan dalam pengiktirafan pemindahan kredit bagi pengajian pada peringkat ijazah sarjana muda di UniSHAMS. Perkara ini memberikan peluang kepada kita untuk kekal berdaya saing dan mampan dalam usaha memperkayakan perjalanan pendidikan para pelajar.

**Para hadirin yang dihormati,**

11. Tidak ada satu universiti pun, tidak kira betapa besarnya ia, akan mampu menghadapi cabaran masa depan dengan sendirinya. Dalam era globalisasi dan saling bergantung ini, perkongsian kerjasama dengan institusi akademik dan pemain industri bukanlah satu pilihan, tetapi satu keperluan.

12. Justeru, saya percaya kerjasama yang terjalin sepertimana hari ini, akan menyumbang kepada wahana yang lebih besar yang dapat menyediakan pendidikan berkualiti kepada pemegang taruh, sejajar dengan aspirasi kami menjadi ke arah menjadi univerisiti yang dikenali dunia menjelang tahun 2025.

13. Akhir kata, sekali lagi saya mengucapkan tahniah kepada UiTM Cawangan Kedah, UUM, UniSHAMS dan LZNK di atas pencapaian bermakna ini. Saya doakan

langkah anda seterusnya dipermudahkan dan berjaya mencapai matlamat yang disasarkan.

**Sekian, terima kasih.**

**Wabillahi Taufiq Walhidayah Wassalamualaikum  
Warahmatullahi Wabarakatuh.**